

KONTROL MOZIOA

COVID-19 BIRUSA DELA ETA OSTALARITZAKO SEKTOREARI EZARRI ZAIKION NEURRI ETA MURRIZKETEI BURUZKOA

Jon Markel Ormazabal Gaztañagak, EH Bildu udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2020ko irailaren 14an Garapen eta Lurralde Planifikazioko Batzordean aztertutako interpelazioaren ondorioa da.

JUSTIFIKAZIOA

COVID-19 birusak eragindako osasun krisiak gizarte osoan izan du eragina. Pandemiari aurre egiteko hartu diren neurriek ere gizarteko eremu guztietan izan dituzte ondorioak. Alarma egoeraren eta konfinamenduaren osteko “normaltasun berrian”, ordea, sektore jakin batzuei beste batzuei baina mugapen zorrotzagoak ezarri zaizkie. Horietako bat da ostalaritzaren sektorea.

Eusko Jaurlaritzak ekainaren 18an iragarri zituen neurri berrien artean, besteak beste, ostalaritza establezimendu guztien ordutegia 1:30era mugatzea zegoen, horrela gaueko aisia mugatzeko. Neurri honek ezinegon eragin zuen aurretik ere dezente kaltetua zen sektorean, eta hori dela eta, Gipuzkoako 70 establezimenduk baino gehiagok adierazpen bat sinatu eta jendarteratu zuten, murrizketak salatzeko eta irtenbide egoki bat eskatzeko.

Abuztuaren 4an Udaletxe aurrean egindako agerraldian, besteak beste, ostalaritza establezimendu batean kasu positibo bakar bat emateagatik taberna ixtea ere gaitzetsi zuten, neurri hori aplikatzen den sektore bakarra zelako eta ez direlako aintzat hartzen gainerako langileen PCR proben emaitzak, nahiz eta negatiboak izan. Halaber, prebentzio neurriak ere –bezeroek ukitzen duten guztiaren desinfekzioa, eta abar– ostalaritzan soilik exijitzen dituztela gogorarazi zuten, eta horiek TAO zerbitzuan, garraio publikoan, osasun zentroetan eta udaletxeetan ere hartu beharko liratekeela azpimarratu zuten.

Zentzu honetan, argigarria da Irutxuloko Hitza egunkariak abuztuaren 26an kaleratutako elkarrizketan, Parte Zaharreko Sariketa eta Sport tabernen jabea den Maitane Uzkudunek, erakunde publikoek hartutako neurri buruz esandakoa:

“Ostalaritzan, hasieratik, neurri asko ezarri dira: distantzia, garbiketa, ordutegiak, eta abar. Uste dut informazioa zuzenagoa eta hobea balitz, horrenbeste aldaketa eta kontraesanik egon gabe, jendeak hobeto beteko lituzkeela: kutsatzeak nola saihestu, PCR testen datuen ehunekoak eta maskarak noiz eta nola erabili, besteak beste. Hori ere ikasketa berri bat izaten ari da denontzat.”

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

“Erakunde publikoetan aldiz, bestei ezartzen dizkiguten neurriak ez dituztela betetzen ikusten dugu noiz nahi. Adibidez, autobusetan ez dira eserlekuak eta ukitzen diren elementuak garbitzen, edukierak murrizten, eta frekuentziak gehitzen. Beste hainbeste kutxazain automatikoetan eta beste leku askotan ere.”

Sektoreko langileen haserrea areagotu egin zen abuztuaren 17an, Eusko Jaurlaritzak bigarren aldiz osasun-larrialdi egoera ezarri zuenean. Izan ere, orduan aurkeztutako neurriek nagusiki ostalaritzaren sektoreari eragiten zieten, oraindik eta murrizketa handiagoak ezarriz. Halaber, hainbat ostalarik “sektorearekiko kriminalizazioa” salatu zuten, batik bat gaueko tabernen kasuan:

“Diagnostiko positibo bat ateratzen den unean gertatzen dena izugarria da: esaterako, nola argitaratzen duten tabernaren izena, eta nola prezintatzen duten lokala, beste sektoreetan ikusten ez dugun bezala.”

Murrizketei dagokionean, esaterako, 3 eta 4 kategorietako lizentzia duten establezimenduek beren jardura eten behar izan dute, nahiz eta hauetako askok batez ere eguneko zerbitzua eskaini. Gauzak horrela, zenbait tabernekek beren lizentzia atzera 2 kategoriara pasatzeko eskaera egin dute, beti ere egoera “normaltzean” aurreko kategoria berreskuratzeko aukera eskatuz. Baina erantzunik ez dute jaso, eta ondorioz, hauetako askok itxita jarraitzen dute une honetan. Zentzu honetan, eta itxiera kategoriaren ondorio bada, horrek sortutako kalteak emendatzeko administrazioak zein neurri hartuko dituen galdetu dute (diru-laguntzak, alokairuak, zergak...), ixteko aginduz gain, ez baitute beste inolako informaziorik jaso.

Hilabete honetako batzordeetan, ardura duen delegatuak adierazi digu lizentzien arazoa konpontzeko neurriak hartu direla, baina sektoreko ordezkariak ziurgabetasun egoera handian jarraitzen dutela adierazi digute eta informazio falta dagoela udalaren aldetik.

Ezin dugu ahaztu aipagai ditugun negozioak hiru hilabetez itxita egon behar izan dutela, eta konfinamenduaren ostean ezartzen joan diren neurriek sortutako egoerek ataka larri jarri dutela sektorea. Honela, konfinamendua amaitzearekin -egoera berrira egokitutako neurriekin bada ere- beren jarduna berreskuratzen ari ziren auzoetako taberna asko ere egoera zailean aurkitzen dira oraindik.

Horregatik guztiarengatik, honako hau da behean sinatzen duen zinegotziak aurkeztutako

KONTROL MOZIOA:

1.- Donostiako Udaltzatzen hertsatuki eskatzen dio Udal Gobernuari hiriko ostalaritza establezimendu guztietara zirkular bat bidali dezala gaur egun sektorean indarrean dauden neurrien berri emateko eta, lizentzia aldaketak direla eta, dituzten aukeren berri informatzeko.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

2.- Donostiako Udalbatzak hertsatuki eskatzen dio Udal Gobernuari Donostia Sustapenaren bidez, berariazko kanal bat ezarri dezala web orrialdean ostalaritzako sektoreko kideei arreta eta informazio zuzena emateko, zalantza eta premiak helarazteko eta, era berean, beste erakunde batzuek abian jarri dituzten baliabide zein neurri ezberdinei buruzko informazioa bilatzen duten pertsona eta enpresetarako espazio bat izateko.

3.- Donostiako Udalbatzak hertsatuki eskatzen dio Udal Gobernuari ostalaritzako establezimendu batean COVID19ko kasu positibo bat detektatzen denean eta itxiera dekretatzen den bitartean pasatzen den denbora murrizteko bitartekaritza lanak egin ditzala Osakidetzarekin, kontuan izanda epearen luzapenak eragiten dituen gastuak (langileen bajak, zergak...) jabearen gain erortzen direla.

Donostian, 2020ko irailaren 18an

Jon Markel Ormazabal Gaztañaga
EH Bildu udal taldeko zinegotzia